

## FUNDARREGLUR

### við borgarstjórnarkosningar í Reykjavík

#### I. kafli. Atkvæðagreiðsla á kjörfundi.

##### 1. gr.

###### *Skilríki*

Kjósandi skal gera grein fyrir sér í þeirri kjördeild sem hann á kosningarétt í með því að framvísa persónuskilríki með, nafni, kennitölu og mynd svo sem vegabréfi, ökuskírteini, eða greiðslukorti útgefnu af fjármálafyrirtæki með nafni mynd og kennitölu kjósandans.

Geti kjósandi ekki framvísað fullnægjandi persónuskilríki skv. 1. mgr. skal undirkjörstjórn ávallt vísa kjósandanum til hverfiskjörstjórnar sem skal kanna til hlítar hvort kjósandi geti gert grein fyrir sér.

##### 2. gr.

###### *Kosning með aðstoð*

Skýri kjósandi undirkjörstjórn frá því að hann þarfnist aðstoðar við atkvæðagreiðslu skal sá fulltrúi kjörstjórnar sem kjósandi tilnefnir veita honum aðstoð í kjörklefanum með þeim hætti sem segir í 89. gr. kosningalaga og reglugerð nr. 432/2022 um aðstoð við atkvæðagreiðslu.

Fulltrúi sem kjósandi óskar eftir að aðstoði hann við að greiða atkvæði í kjörklefanum samkvæmt því sem kveðið er á um í IV. kafla reglugerðar nr. 432/2022 skal hafa náð 18 ára aldri.

Slíkum fulltrúa er óheimilt að vera fulltrúi fleiri kjósenda við kosninguna en samtals þriggja og má hvorki vera frambjóðandi í kosningunum eða maki, barn, systkini eða foreldri slíks frambjóðanda.

##### 3. gr.

###### *Leynileg kosning*

Kjósanda er óheimilt að sýna af ásettu ráði hvernig hann kys eða hefur kosið eða birta myndir af auðum eða útfylltum kjörseðli með hvers konar opinberri birtingu, þar með talið á samfélagsmiðlum, á vefsíðum eða í fjölmiðlum.

Kjósanda er óheimilt að nota síma, tölvu, eða hvers konar önnur fjarskiptatæki í kjördeildinni.

Kjósandi skal ávallt fara einn í kjörklefa til þess að kjósa. Undirkjörstjórn getur þó heimilað kjósanda að taka ungarn með í kjörklefan, sem ætla má að ekki hafi öðlast þroska til þess að greina frá því hvernig kjósandinn greiðir atkvæði.

4. gr.

*Aðgangur að kjördeild*

Öðrum en kjósendum sem kosningarétt eiga í viðkomandi kjördeild, aðstoðarmanni kjósanda samkvæmt 89. gr. kosningalaga, fulltrúum í kjörstjórnnum og starfsfólki við framkvæmd kosninganna, umboðsmönnum lista og kosningaeftirlitsmönnum samkvæmt 1. mgr. 138. gr. kosningalaga, er óheimill aðgangur að kjördeild meðan á kjörfundi stendur, nema yfirkjörstjórn heimili annað.

5. gr.

*Óleyfilegur kosningaáróður eða kosningaspjöll á kjörstað*

Verði hverfiskjörstjórn eða yfirkjörstjórn vör við að brotið sé gegn 1. mgr. 81. gr. kosningalaga skal hún tafarlaust grípa til allra nauðsynlegra aðgerða til þess að stöðva óleyfilegan kosningaáróður, kosningaspjöll eða aðra framgöngu sem truflar eða hindrar framkvæmd kosninganna.

6. gr.

*Myndataka í kjördeildum*

Meðan á kosningu stendur eru hvers konar myndatökur í kjördeildum óheimilar.

Með samþykki viðkomandi kjósanda og að því tilskildu að það trufla ekki atkvæðagreiðslu að öðru leyti, er myndataka af því þegar kjósandinn gefur sig fram við undirkjörstjórn eða þegar hann setur kjörseðil í atkvæðakassa heimil.

Ávallt skal ljósmyndari standa fyrir utan kjördeildina meðan á myndatöku stendur.

7. gr.

*Ósæmandi háttsemi á kjörstað*

Hverfiskjörstjórn er heimilt að vísa hverjum þeim af kjörstað sem beitir eða hótar að beita ofbeldi, sýnir af sér ógnandi hegðun eða hvers konar aðra háttsemi, sem veldur röskun eða truflun á kosningunni.

## **II. kafli. Umboðsmenn framboðslista.**

8. gr.

*Tilnefning umboðsmanna og aðstoðarmanna*

Umboðsmenn lista eru tilnefndir af frambjóðendum hvers framboðslista samkvæmt því sem segir í ákvæði X. kafla kosningalaga.

Umboðsmenn lista eiga rétt á að tilnefna aðstoðarmenn sem koma fram fyrir hönd þeirra við framkvæmd kosninga.

Tilnefningar skulu berast yfirkjörstjórn í síðasta lagi tíu dögum fyrir kjördag og skal yfirkjörstjórn útbúa sérstök skilríki fyrir aðstoðarmenn sem þeir skulu bera við eftirlit sitt.

Réttindi og skyldur aðstoðarmanna gagnvart kjörstjórnnum eru hinar sömu og umboðsmanna framboðslista.

## 9. gr.

### *Almennt um eftirlit umboðsmanna*

Umboðsmenn eru sjálfstæðir í störfum sínum og bera sjálfir ábyrgð á eftirliti sínu.

Þeir skulu haga eftirliti sínu með kosningu, flokkun og talningu samkvæmt þeim heimildum sem kveðið er á um í kosningalögum.

Umboðsmenn eiga rétt á því að gæta þess að kjörstjórn og kjósendur hegði sér lögum samkvæmt við kosningaathöfnina og má hver þeirra átelja það við kjörstjórnina það sem honum finnst áfátt.

Umboðsmenn hafa ekki boðvald yfir kjörstjórnnum eða starfsfólki þeirra og er óheimilt með öllu að stöðva, tefja eða spilla framkvæmd kosninganna, þar með talið við flutning atkvæðakassa úr kjördeild.

Umboðsmenn skulu við framkvæmd eftirlits síns gæta að því að sýna almenna háttvísi og hvorki torvelda né tefja framkvæmd kosninganna.

Umboðsmenn skulu við framkvæmd eftirlits með kosningum bera skilríki samkvæmt 10. gr. reglna þessarar, eða annað auðkenni, sem yfirkjörstjórn lætur þeim í té.

Umboðsmönnum er óheimilt að bera merki eða auðkenni framboðslista á kjörstöðum á meðan kjörfundur stendur yfir.

Umboðsmönnum er skylt að hlíta fundarreglum þessum við eftirlit sitt sem og öðrum fyrirmælum hverfis-, yfirkjörstjórnar eða starfsfólks þeirra.

## 10. gr.

### *Innsiglan atkvæðakassa og kjörgagna*

Umboðsmönnum er heimilt að setja innsigli sín á þá atkvæðakassa og kjörgögn sem kjörstjórn innsiglar, sbr. 56. gr. kosningalaga.

Innsigli umboðsmanna mega ekki innihalda heiti, tákn, eða auðkenni framboðslista, og innsigli þeirra mega ekki skarast við innsigli kjörstjórnar, sbr. 2. mgr. 12. gr. reglna nr. 422/2022 um gerðabækur kjörstjórna og innsigli við kosningar.

Framkvæmd og athugun innsigla af hálfu umboðsmanna skal ekki trufla atkvæðagreiðslu á kjörfundi, undirbúning flokkunar og talningar eða talningu atkvæða.

## 11. gr.

### *Eftirlit í einstaka kjördeildum*

Meðan á kjörfundi stendur mega umboðsmenn vera að hámarki tveir í hverri kjördeild við framkvæmd eftirlits, nema hverfiskjörstjórn eða yfirkjörstjórn heimili annað.

Umboðsmenn skulu gæta þess við eftirlit að trufla ekki kosningaathöfnina í kjördeildinni og sýna kjósendum tillitssemi og koma fram við þá af háttvísi.

Meðan á kjörfundi stendur er umboðsmönnum óheimil myndataka í kjördeildum.

Hvers konar afritun kjörgagna, kjörskrár, eða gerðabókar kjörstjórna er umboðsmönnum óheimil (þ.m.t. með myndatöku) en við flutning atkvæðakassa er heimilt að taka myndir af þeim þegar þeir eru komnir út úr kjördeildinni.

Telji umboðsmenn eitthvað athugasemdi við kosningaathöfn í einstaka kjördeildum skulu þeir koma athugasemdum að við hverfiskjörstjórn og eftir atvikum láta bóka í gerðabók hverfiskjörstjórnar samkvæmt því sem segir í 13. gr. fundarreglna þessara.

Umboðsmönnum er ávallt heimilt að koma slíkum athugasemdum beint að við yfirkjörstjórn og eftir atvikum láta bóka í gerðabók yfirkjörstjórnar samkvæmt því sem segir í 13. gr. fundarreglna þessara.

## 12. gr.

### *Flokkun og talning atkvæða*

Umboðsmönnum er heimilt að vera viðstaddir við flokkun atkvæða áður en kjörfundi lýkur, en skulu ávallt hlíta ákvæði 16. gr. fundarreglna þessara. Umboðsmönnum er jafnframt heimilt að vera viðstaddir flokkun og talningu atkvæða eftir að kjörfundi lýkur.

Umboðsmenn skulu við framkvæmd eftirlits við flokkun og talningu atkvæða fara eftir fyrirmælum yfirkjörstjórnar þ.m.t. að vera á tilgreindum svæðum á talningarstað.

Umboðsmönnum er óheimilt að eiga við atkvæði á talningarstað, koma við þau eða eiga bein samskipti við starfsfólk sem vinnur að flokkun og talningu, nema yfirkjörstjórn heimili annað.

Allar athugasemdir sem umboðsmenn gera við framkvæmd flokkunar og talningar skulu þeir gera við yfirkjörstjórn.

Umboðsmönnum er óheimilt að stöðva, tefja eða spilla framkvæmd flokkunar og talningar.

## 13. gr.

### *Bókanir umboðsmanna*

Umboðsmenn eiga rétt að láta bóka ágreiningsálit um það sem þeir telja ólöglegt við kosningaathöfnina og sem þeir fá ekki þegar leiðrétt samkvæmt 57. gr. kosningalaga.

Umboðsmenn skulu afhenda kjörstjórn skriflega bókun þar sem glögglega er greint frá því ágreiningsefni sem færa skal í gerðabók. Kjörstjórn getur þó ákveðið að bóka styttri munnlega athugasemd umboðsmanns eða þá að umboðsmaður skuli sjálfur bóka ágreiningsefnið í gerðabók.

Neiti hverfis- eða yfirkjörstjórn umboðsmanni um að færa bókun í gerðabók er umboðsmanni heimilt að bóka sjálfur í gerðabók enda riti hann nafn sitt þar undir sbr. lokamálslið 57. gr. kosningalaga nr. 112/2021.

Allir bókanir umboðsmanna samkvæmt þessari grein skulu vera á íslensku.

14. gr.

#### *Brottvísun umboðsmanns af kjör- eða talningarstað*

Fylgi umboðsmaður ekki reglum þessum, öðrum fyrirmælum hverfis- eða yfirkjörstjórnar, eða viðhafi hegðun eða háttsemi, sem veldur röskun eða truflun á framkvæmd atkvæðagreiðslu, eða flokkun og talningu atkvæða, er hverfis- eða yfirkjörstjórn rétt að áminna umboðsmanninn. Skal um slíka áminningu og grundvöll hennar bókað í gerðabók.

Sinni umboðsmaður ekki áminningu, beiti eða hótí ofbeldi, sýni af sér ógnandi hegðun, eða viðhafi aðra háttsemi sem veldur stórfelldri röskun eða truflun á framkvæmd kosninganna eða flokkun og talningu atkvæða, skal yfirkjörstjórn, eða hverfiskjörstjórn, að undangengnu samráði við yfirkjörstjórn, vera heimilt að vísa umboðsmanni af kjör- eða talningastað. Skal um slíka brottvísun og grundvöll hennar bókað í gerðabók.

Við brottvísun samkvæmt 2. mgr. skal yfirkjörstjórn upplýsa aðra umboðsmenn listans eða oddvita framboðslistans um brottvísun, og ef þörf krefur að mælast til þess að framboðslistinn tilnefni nýjan umboðsmann í stað þess sem vísað hefur verið brott.

### **III. kafli. Flokkun og talning atkvæða.**

15. gr.

#### *Flokkun og undirbúningur talningar fyrir luktum dyrum*

Við flokkun og undirbúning talningar sem fram fer áður en kjörfundi lýkur er öllum þeim sem starfa við framkvæmd flokkun og undirbúning talningar eða umboðsmönnum lista óheimilt að hafa með sér inn í talningarsal síma, tölvu, annað fjarskiptatæki, myndavélar eða hljóðupptökutæki sbr. 3. mgr. 10. gr. reglugerðar nr. 431/2022 um talningu atkvæða.

Neiti einhver að afhenda tæki samkvæmt ákvæði 1. mgr. er viðkomandi óheimilt að vera viðstaddur flokkun og undirbúning talningar.

Sama á við ef rökstuddur grunur er um að viðkomandi aðili hafi nokkurt ofangreindra tækja í fórum sínum.

16. gr.

#### *Talning atkvæða fyrir opnum dyrum*

Talning atkvæða fer fram að kjörfundi loknum og fyrir opnum dyrum. Skal almenningi heimill, eftir því sem húsrúm leyfir, aðgangur að skilgreindum áhorfendasvæðum á talningarstað. Ávallt ber viðstöddum að fylgja fyrirmælum yfirkjörstjórnar eða starfsfólks hennar varðandi viðveru á talningarstað.

Yfirkjörstjórn er heimilt að vísa hverjum þeim af talningarstað sem beitir eða hótar að beita ofbeldi, kemur fram með ógnandi eða ósæmandi hegðun eða hvers konar háttsemi, sem veldur röskun eða truflun á flokkun eða talningu atkvæða.

#### **IV. kafli. Sóttvarnaráðstafanir.**

17. gr.

Kjósendum, umboðsmönnum, kjörstjórnnum, starfsmönnum þeirra og öðrum sem erindi eiga um kjörstaði, aðsetur yfirkjörstjórnar eða talningarstað ber að fylgja gildandi sóttvarnaáætlunum.

18. gr.

##### *Gildistaka og lagastöð*

Fundarreglur þessar eru settar með stöð í ákvæði 4. mgr. 53. gr. kosningalaga og taka strax gildi.

Um leið falla úr gildi eldri fundarreglur nr. 1, 27. apríl 2018, við borgarstjórnarkosningar í Reykjavík.

Yfirkjörstjórn Reykjavíkur, 28. apríl 2022

Eva Bryndís Helgadóttir

Ari Karlsson

Tómas Hrafn Sveinsson